

21 mholadh chun an fuath sa tsochaí a chomhrac

An fhadhb arna sainmhíniú ag na saoránaigh

Le linn trí dheireadh seachtaine, phléamar sa Phainéal Saoránach Eorpach maidir leis an bhfuath sa tsochaí a chomhrac, ina bhfuil 150 saoránach a roghnaíodh go randamach ó na 27 mBallstáit den Aontas, conas déileáil leis an bhfuath inár sochaí. Tá cúlraí éagsúla againn, ach tá comhthuisceant againn ar an bhfadhb. Aithníonn an Painéal seo go bhfuil cúiseanna éagsúla ann a chuireann le méadú agus le marthanacht an fhuatha inár sochaí, agus cuireann sé an t-idirghníomhú casta idir gnéithe mothúchána, sóisialta agus eacnamaíocha i dtábhacht ag an am céanna.

- **Coinbhleachtaí agus Oidhreacht Stairiúil:** Is féidir le coinbhleachtaí stairiúla agus coinbhleachtaí atá ann faoi láthair oidhreacht fuatha a chruthú ó ghlúin go glúin. I stair chasta na hEorpa, chuir gach coinbhleacht, gach cogadh agus gach teannas geopholaitiúil leis an timthriall sin. Gan iarrachtaí gníomhacha chun aghaidh a thabhairt ar na créachtaí sin agus iad a leigheas, leanann an fuath a chothaíonn coinbhleachtaí ar aghaidh, agus tá baol ann go mbuanóidh sé timthriall naimhdis agus deighilte.
- **Géarchéim eacnamaíoch agus shóisialta:** Le hathruithe tapa sóisialta agus cultúrtha, spreagtar meon de chaillteanas agus de mhíbhuntáiste, rud a fhágann go mbíonn an fuath ag dul in olcas. D'fhéadfadh sin a bheith in aghaidh réimse leathan grúpaí agus saoránach, agus cuirtear an milleán orthusan as an ngéarchéim eacnamaíoch agus shóisialta. Ní hamháin go n-eascraíonn an neamh-chomhionannas as tosca sochpholaitiúla agus socheacnamaíocha, ach is féidir leis na tosca sin an neamhshláine agus an eagla a spreagadh freisin.
- **Polaitíocht agus freagracht:** Tá freagracht mhór ar gach polaiteoir agus ar gach pearsa poiblí aghaidh a thabhairt ar an bhfuath agus é a chomhrac, ach is féidir leo féin an fuath a chothú trí chaitheamh go míchuí le grúpaí eitneacha agus trí dhúshaothrú an náisiúnachais, mar aon le deighiltí agus pobalachas ar mhaithe le gnóthachan pearsanta. Is féidir le pearsana polaitiúla agus poiblí laistigh den Aontas agus lasmuigh de araon an fhuathchaint a úsáid chun uaimhianta críochacha a chothú agus chun an daonlathas a dhídhlisteanú. Déantar deighiltí a dhoimhniú trí thús áite a thabhairt d'argóintí glóracha in ionad dioscúrsa agus plé stuama, rud a chuireann le tuairimí míchuibheasacha agus teoiricí comhcheilge.
- **Meáin, mífhaisnéis, agus cuntasacht:** Cuireann na meáin thraidisiúnta agus líonraí sóisialta leis an méadú atá ag teacht ar an léiriú 'sinne ina gcoinnesan' agus ar an bhfuath i leith grúpaí éagsúla, go minic chun brabús a dhéanamh. Is féidir leis na meáin thraidisiúnta an t-eolas mícheart a thabhairt agus insintí fuafara a chur chun cinn d'aon ghnó. I líonraí sóisialta, tá ról rithábhachtach ag an anaithnideacht agus algartaim chúbláilte i scaipeadh na fuathchainte agus an idirdhealaithe. Is éard atá sna líonraí sin cainéil le haghaidh mífhaisnéise agus chun steiréitíopaí a bhuanú, go háirithe in aghaidh na mban agus na hóige a ndéantar ciapadh suntasach orthu ar líne. Cuirtear leis an méid sin a thuilleadh mar gheall ar easpa cuntasachta do líonraí agus d'úsáideoirí.
- **Meon an tslua, claontacht, agus éadulaingt:** Gné bhunúsach de nádúr an duine is ea an mhian a bheith páirteach i ngrúpa sóisialta nó i ndinimic, chun bheith 'cosúil le gach

duine eile'. Uaireanta féadfaidh an mhian sin a bheith chomh láidir sin go n-eascaíonn fuath agus éadulaingt aisti, is é sin meon 'sinne ina gcoinnesean' i leith 'an dreama eile'. Déanann dinimic sin an amhrais agus an fhuatha difear go háirithe do dhaoine agus do ghrúpaí leochaileacha bunaithe ar eitneacht, stádas imirce, reiligiún, inscne, gnéaschlaonadh, míchumas, stádas teaghlaigh agus tosca socheacnamaíocha. Féadfaidh an easpa oideachais maidir le féiniúlachtaí éagsúla, cultúir éagsúla, caoinfhulaingt, díospóireacht agus cumarsáid, mar aon leis an easpa eolas iontaofa ar líne, míthuiscintí a threisiú agus an chlaontacht a bhuanú, agus d'fhéadfadh fuath eascairt as an méid sin.

Déanann cúiseanna sin an fhuatha difear do gach cuid dár sochaí. Creidimidne, na saoránaigh de na 27 mBallstát den Aontas Eorpach a bhfuil cúlaí éagsúla againn, gur tosaíocht é an comhrac in aghaidh an fhuatha san Eoraip agus ar fud an domhain. Is orainne atá an fhreagracht chomhroinnte gach cineál fuatha a chosc agus a fhreagairt ar an leibhéal aonair, an leibhéal sochaíoch agus an leibhéal institiúideach bunaithe ar luachanna coiteanna agus cearta bunúsacha an Aontais: síocháin, saoirse agus comhionannas. Dá bhrí sin, molaimid gníomhú i réimsí éagsúla chun na cearta bunúsacha sin a chosaint, chun idirdhealú, fuath agus coinbhleachtaí a chosc, chun na daoine is leochailí a chosaint, agus ar deireadh thiar chun Aontas Eorpach urramach cóir a mhúnlú do chách.

Na moltaí deiridh

Rinneadh na moltaí seo a leanas a ghrúpáil ina gcúig cheannteideal:

- An córas freagartha ar an bhfuathchoireacht agus ar an bhfuathchaint
- Ról na meán agus na polaitíochta
- An saol digiteach agus teicneolaíocht
- Oideachas
- Rannpháirtíocht na saoránach agus cuimsiú sóisialta

An córas freagartha ar an bhfuathchoireacht agus ar an bhfuathchaint

Moladh 1: Eoraip amháin, sainmhíniú amháin: An fhuathchaint a choiriúlú

Molaimid don Choimisiún meitheal éagsúil a bhunú chun an sainmhíniú coiteann ar 'fhuathchaint neamhdhleathach' a thabhairt cothrom le dáta agus a leathnú chun scaipeadh na fuathchainte sin a choiriúlú ar bhealach níos fearr. Leis an sainmhíniú atá ann faoi láthair a glacadh in 2008, díritear ar chiníochas agus ar sheineafóibe ach eisiatar cineálacha eile fuatha, cuir i gcás an cumasachas agus an t-idirdhealú bunaithe ar ghnéaschlaonadh, inscne, aois, agus tuilleadh fós. Ní mór athbhreithniú práinneach a dhéanamh ar an téarma seanchaite seo chun luachanna ionchuimsitheacha ár sochaí nua-aimseartha a léiriú.

Tá tábhacht ollmhór le sainmhíniú cuimsitheach nua a bheith ann chun gur féidir cion coiriúil a dhéanamh de leathadh na fuathchainte neamhdhleathaí ar fud Bhallstáit uile an Aontais. Cinnteoidh an t-oiriúnú sin go n-aithneofar gach cineál fuathchainte agus go ngearrfar pionós go haonfhoirmeach orthu, rud a neartóidh ár dtiomantas do shochaí níos ionchuimsithí agus níos measúla.

Tríd an bhfuathchaint a chur san áireamh i liosta choireanna an Aontais, is féidir linn pobail imeallaithe a chosaint agus dínit an duine a chaomhnú. Leis an tionscnamh seo déantar idirdhealú idir an fhuathchaint neamhdhleathach agus an tsaoirse chun tuairimí a nochtadh, rud a chinntíonn go n-aimsimid an chothromaíocht idir cearta bunúsacha agus an gá atá le hidirdhealú agus fuath a chomhrac.

Údar:

Comhtháthú sóisialta a chur chun cinn: Tríd an sainmhíniú a thabhairt cothrom le dáta chun gach cineál fuathchainte a chuimsiú, cothaítear sochaí níos ionchuimsithí ina mothaíonn gach duine go bhfuil meas agus luach orthu. Cuireann sé sin an comhtháthú sóisialta chun cinn agus laghdaíonn sé na deighiltí a eascraíonn as fuathchaint gan chosc.

An tsoiléireacht dhlíthiúil a fheabhsú: Le sainmhíniú aontaithe ar fud Bhallstáit uile an Aontais, cuirfear deireadh le neamhréireachtaí agus bearnaí sna cosaintí dlíthiúla. Cinnteofar leis an tsoiléireacht sin go dtabharfar déantóirí choir na fuathchainte chun cuntais, gan beann ar an áit ina bhfuil siad san Aontas.

Pobail imeallaithe a chosaint: Tríd an sainmhíniú a leathnú chun tuilleadh cineálacha idirdhealaithe a chumhdach, soláthraítear cosaint níos fearr do ghrúpaí imeallaithe, rud a laghdaíonn a neamhchosaint ar theanga dhíobhálach agus mhaslach.

Cearta an duine a neartú: Trí gach cineál fuathchainte a choiriúlú, neartóidh an tAontas a ghealltanais do chearta agus do dhínit an duine, agus creataí dlíthiúla á n-ailíniú le luachanna comhaimseartha an chomhionannais agus an mheasa.

Saoirsí a chothromú: Leis an gcur chuige sin, déanfar idirdhealú cúramach idir an fhuathchaint agus an tsaoirse chun tuairimí a nochtadh, rud a chinnteoidh go gcosnófar an tsaoirse cainte agus cosc á chur an tráth céanna ar chaint lena ngríosaítear foréigean, fuath nó idirdhealú.

Comhbhá agus tuiscint a chothú: Le nochtadh do dhearcthaí éagsúla agus coiriúlú na fuathchainte, spreagfar comhbhá agus tuiscint i measc na saoránach, rud a chuirfidh le sochaí níos síochánta agus níos measúla.

Mar thoradh ar an moladh sin a chur i bhfeidhm, is córa agus is comhtháite a bheidh an Eoraip, mar a mbeidh gach duine, gan beann ar a f(h)éiniúlacht féin, in ann maireachtáil gan eagla roimh an bhfuath ná roimh an idirdhealú.

An moladh i mbeagán focal:

- Meitheal éagsúil a bhunú chun sainmhíniú cuimsitheach ar ‘fhuathchaint neamhdhleathach’ a fhorbairt lena gcuimseofar gach cineál idirdhealaithe.
- An sainmhíniú seanchaite ó 2008 a thabhairt cothrom le dáta chun gach cineál fuathchainte a chuimsiú.
- An fhuathchaint a aithint agus pionós a ghearradh uirthi go haonfhoirmeach ar fud an Aontais.
- Cion coiriúil a dhéanamh de scaipeadh na fuathchainte neamhdhleathaí ar fud Bhallstáit uile an Aontais.

Moladh 2: Prótacal freagartha éifeachtaí Eorpach maidir le fógraí fuathchoireachta

Molaimid próiseas soiléir aonfhoirmeach chun coireanna fuatha a thuairisciú ar fud Bhallstáit uile an Aontais. Ba cheart an próiseas dlíthiúil sin a chur i bhfeidhm go héifeachtach in

eagraíochtaí a bhíonn ag idirghníomhú le híospartaigh coireanna fuatha. Molaimid athbhreithniú a dhéanamh ar gach beart a moladh roimhe seo a bhí neamhéifeachtach agus próiseas simplí a fhorbairt chun a chur ar chumas íospartach agus finnétithe gach coir, agus coireanna ar ardáin ar líne san áireamh, a thuairisciú go sábháilte.

Ar an gcéad dul síos, ba cheart go gcinnteofaí leis an bpróiseas dálaí tuairiscithe sábháilte d'íospartaigh agus d'fhinneítithe coireanna fuatha. Má chinntítear a sábháilteacht, féadfar an líon coireanna tuairiscithe a mhéadú. Cuimsítear leis sin bearta cosanta dlíthiúla agus síceolaíochta agus, más gá, cosaint fhisiciúil ar dhaoine atá ag lorg díoltais. D'fhéadfadh obair le ciontóirí, a d'fhéadfadh a bheith ina n-íospartaigh fuatha roimhe seo, a bheith i gceist leis an bpróiseas freisin.

Ar an dara dul síos, ba cheart do na páirtithe uile atá páirteach sa slabhra tuairiscithe coireachta a bheith páirteach sa phróiseas chun an riosca íospartha tánaistí agus an riosca géaraithe tráma a laghdú.

Ar deireadh, ba cheart go dtacófaí leis an bpróiseas le cainéal iomchuí ar líne atá deartha chun coir a thuairisciú go sábháilte.

Údar:

Tá an moladh sin tábhachtach toisc go gcuidíonn sé le híospart thánaisteach na n-íospartach a sheachaint agus/nó a íoslaghdú. Leis an bpróiseas beifear in ann freagairt ar íospartaigh agus cúnamh a thabhairt dóibh go tapa, mar aon le tacaíocht agus cosaint a thabhairt d'fhinneítithe. Éascóidh próiseas den sórt sin gníomhaíochtaí na seirbhísí a gheobhaidh an tuarascáil freisin. Má tá an próiseas éifeachtach, spreagfar an tsochaí chun freagairt do choireanna agus iad a thuairisciú níos minice.

An moladh i mbeagán focal:

- Próiseas soiléir aonfhoirmeach a bhunú chun coireanna fuatha a thuairisciú ar fud Bhallstáit uile an Aontais.
- Athbhreithniú ar gach beart neamhéifeachtach a moladh roimhe seo agus próiseas simplí a fhorbairt chun é a chur ar chumas íospartach agus finnétithe gach coir a thuairisciú go sábháilte, coireanna ar ardáin ar líne san áireamh.
- Bealach ar líne a chur i bhfeidhm chun coireachta a thuairisciú go sábháilte.

Moladh 3: Oifig náisiúnta um fhuath a chomhrac sna Ballstáit

Molaimid Oifig neamhspleách um fhuath a chomhrac a bhunú i ngach Ballstát. Tá institiúid láidir de dhíth orainn ag a bhfuil údarás dlíthiúil agus a dhéanfaidh cumarsáid éifeachtach, lena soláthraítear cúnamh follasach do dhaoine trí chóras oibiachtúil neamhspleách chun coireanna a thuairisciú.

Ar an gcéad dul síos, beidh an Oifig freagrach as tacaíocht dhlíthiúil agus shíceolaíoch a sholáthar do gach íospartach fuathchoireachta ina mBallstát féin, agus í ag obair go dlúth le heagraíochtaí neamhrialtasacha agus le coiste saoránach. Soláthróidh an Oifig ardán chun coireanna fuatha a thuairisciú go héifeachtach agus go sábháilte do na híospartaigh.

Ar an dara dul síos, oibreoidh an Oifig go dlúth le Grúpa Ardleibhéil an Aontais um chomhrac na fuathchainte agus na fuathchoireachta, nó a leithéid, chun a misean a chomhlíonadh agus chun cur i bhfeidhm na gCód Iompair do ghnólachtaí, d'eagraíochtaí agus do pholaiteoirí a

chinntiú. Cuideoidh an comhar sin le timpeallacht éifeachtach thacúil a chruthú d'íospartaigh. Ina theannta sin, d'fhéadfadh an Oifig eolas agus dea-chleachtais a sholáthar do dhaoine aonair atá ag lorg comhairle. Ba cheart do phearsanra na hOifige fónamh ar bhonn téarma. Ar an tríú dul síos, scaipfidh an Oifig uirlisí, cláir, sásraí agus ábhair an Aontais maidir le fuath, rud a chinnteoidh go mbainfidh siad institiúidí oideachais, institiúidí riaracháin, agus an pobal i gcoitinne amach ar an leibhéal náisiúnta agus réigiúnach. Chun é sin a chinntiú, soláthróidh an Oifig oiliúint do na seirbhísí a bhaineann leis an gcéad fhreagairt tar éis an tuairiscithe. Ar deireadh, baileoidh an Oifig sonraí faoi choireanna fuatha chun freagairtí éifeachtacha a fhorbairt ar riachtanais an daonra amach anseo.

Údar:

Tá méadú tagtha ar an bhfuathchoireacht inár sochaithe deighilte, agus tá folláine na ndaoine ag dul in olcas dá thoradh sin. Chun an fhuathchoireacht a chosc, chun í a fhreagairt agus chun aire a thabhairt do na híospartaigh, is gá institiúidí agus sásraí éifeachtacha a bheith i bhfeidhm. Thairis sin, ag tús gach coire tá smaoineamh nó focal ann. Chun oideachas maidir le meas a chinntiú agus chun feacht a mhúscailt, is gá institiúid thiomnaithe a bhunú a chuirfidh cosc ar choireanna fuatha agus a thacóidh le híospartaigh, go háirithe ós rud é nach ann d'oifig den sórt sin go fóill ach go bhfuil géarghá léi.

An moladh i mbeagán focal:

- Timpeallacht éifeachtach thacúil a chruthú d'íospartaigh.
- Oifig neamhspleách um fhuath a chomhrac a bhunú i ngach Ballstát.

Oibreoidh an Oifig go dlúth le Grúpa Ardleibhéil an Aontais um chomhrac na fuathchainte agus fuathchoireachta, nó a leithéid, chun a misean a chomhlíonadh.

Moladh 4: Oiliúint caoinfhulaingthe

Molaimid go ndéanfaidh an tAontas na cúrsaí oiliúna atá ann cheana maidir leis an bhfuathchoireacht, an fhuathchaint agus an chumarsáid neamhfhoréigineach a scaipeadh ar bhealach níos fearr agus a chur chun cinn do spriocghrúpaí sonracha. I bprionsabal, ba cheart oideachas níos fearr a chur ar gach grúpa sóisialta agus ba cheart dóibh na scileanna a fhorbairt chun an fuath a chomhrac. Mar sin féin, creidimid go bhfuil sé thar a bheith tábhachtach oiliúint níos fearr a sholáthar do dhaoine atá ag obair san earnáil phoiblí (e.g. póilíní nó oibrithe sóisialta). Tar éis an tsaoil, is minic gurb iad seo na chéad daoine lena mbíonn íospartaigh agus daoine atá thíos leis i dteagmháil nuair a d'fhulaing siad fuath. Tá sé thar a bheith tábhachtach go mbíonn státseirbhísigh in ann déileáil go hógair leis an tsaincheist agus leis an duine aonair féin. Ba cheart tairiscint oiliúna thráthrialta a bheith ann do státseirbhísigh i mBallstáit an Aontais, trínar féidir oiliúint ar an láthair agus oiliúint ar líne araon a dhéanamh. Spriocghrúpa tábhachtach eile is ea na cruthaitheoirí ábhair, mar rannpháirtithe agus mar ambasadóirí araon don oiliúint. Bíonn tionchar mór acu ar spriocghrúpaí óga agus gníomhaíonn siad mar iolraitheoirí. Ba cheart do dhaoine a oibríonn i bpoist phoiblí san Aontas dea-shampla a thabhairt agus an oiliúint a dhéanamh chomh maith. Chun deiseanna oiliúna a chur ar fáil don phobal i gcoitinne, d'fhéadfadh ceardchumainn nó eagraíochtaí eile a bheith páirteach chun an oiliúint a chur chun cinn. D'fhéadfaí fógraí a chur i nuachtáin phobail freisin. Gheobhadh rannpháirtithe teastas as an oiliúint a chríochnú go rathúil, rud lenar féidir leo an inniúlacht atá faighte acu a léiriú don saol mór maidir le déileáil le fuath.

Údar:

Is leis na steiréitíopaí agus na clíséanna atá ann a thosaíonn pirimid an fhuatha. Is leis an bhfuathchaint a chuirtear chun cinn iad. Dá bhrí sin, tá sé tábhachtach dul go fréamh na faidhbe. Ní hamháin go mbíonn tionchar ag an oiliúint ar na daoine a dhéanann í, ach ar na daoine thart timpeall orthu chomh maith. Cuireann cúrsaí oiliúna le cláir oideachais fhoirmiúil (mar shampla, oideachas ar scoil nó san ollscoil) ar bhealach tábhachtach. Tá go leor clár agus ábhair oiliúna a ndearnadh meastóireacht mhaith orthu ar fáil san Aontas cheana féin. Mar sin féin, tá sé deacair iad a aimsiú. Chun a chinntiú go mbíonn na cláir a forbraíodh fíor-éifeachtach agus inbhuanaithe, agus go mbaineann siad an spriocghrúpa amach, ní mór iad a fhógairt ar bhealach níos fearr. Tá tábhacht leis an mbéim ar dhaoine san earnáil phoiblí freisin, ós rud é go bhfuil an iomarca cásanna fós ann díobh siúd a raibh taithí dhiúltach acu le gníomhaireachtaí rialtais.

An moladh i mbeagán focal:

- Cúrsaí oiliúna an Aontais atá ann cheana maidir leis an bhfuathchoireacht, an fhuathchaint, agus cumarsáid neamhfhoreigineach a chur chun cinn, agus díriú go háirithe ar oibrithe na hearnála poiblí agus ar na cruthaitheoirí ábhair.
- Oiliúint thráthrialta, ar an láthair agus ar líne a sholáthar do státseirbhísigh chun saincheistanna a bhaineann le fuath a láimhseáil go híogair agus go héifeachtach.
- Páirt a thabhairt do cheardchumainn agus do nuachtáin phobail chun feasacht agus rannpháirtíocht i gcláir oiliúna a mhéadú.
- Deimhnithe a eisiúint ar rannpháirtithe chun a n-inniúlacht maidir le haghaidh a thabhairt ar shaincheistanna a bhaineann le fuath a léiriú go poiblí.

Moladh 5: Feasacht a mhéadú faoin bhfuath agus faoi bhearta agus réitigh atá ann cheana chun cur ina choinne trí fheachtas poiblí

Molaimid don Aontas feachtas poiblí a chur i bhfeidhm maidir le contúirt agus cúiseanna an fhuatha, agus maidir leis na bearta ina aghaidh (ar líne agus as líne araon) chun feasacht a mhúscailt agus chun oideachas a chur ar dhaoine faoina leitheadúlacht agus faoi na contúirtí a bhaineann leis. An tráth céanna, chuirfeadh sé eolas ar fáil faoi thionscnaimh éagsúla an Aontais in aghaidh an fhuatha, agus faoi na bealaí agus na bearta tacaíochta atá ar fáil d'íospartaigh.

Chun go mbeidh feachtais teachtaireachtaí frithfhuatha chomh héifeachtach agus is féidir, molaimid na spriocghrúpaí, an cur chuige, na bealaí agus an t-ábhar a shainiú agus a shonrú go soiléir. Ba cheart dó an méid seo a leanas a dhéanamh:

- An feachtas a dhíriú ar an bpobal i gcoitinne mar aon le grúpaí sonracha agus tábhachtacha (e.g. íospartaigh, déantóirí coire, leanaí);
- Teachtaireachtaí a chur ar bun atá saincheaptha do na grúpaí éagsúla sin agus do chomhthéacs Bhallstáit éagsúla an Aontais trí úsáid a bhaint as cineálacha cur chuige atá éadromchroíoch inrochtana agus atá saincheaptha do chomhthéacs gach Ballstáit.
- Béim a leagan ar an bhfreagracht atá ar shaoránaigh uile an Aontais cur i gcoinne an fhuatha a gcasann siad air ina saol féin agus oibriú in aghaidh an fhuatha sin, trí uirlisí praiticiúla agus eolas a sholáthar maidir leis an gcaoi ar féidir leo an méid sin a dhéanamh;
- Bealaí cumarsáide traidisiúnta agus neamhghnácha araon a úsáid as líne agus ar líne chun na teachtaireachtaí frithfhuatha a scaipeadh chun teacht ar fho-chodanna éagsúla den tsochaí trí bhealaí níos éifeachtaí agus níos áisiúla don úsáideoir.

- Páirt a thabhairt do na meáin thraidisiúnta agus na meáin shóisialta, mar aon le tionchairí agus guthanna na n-íospartach, i ndréachtú agus i gcomhroinnt na dteachtaireachtaí sin chun a chinntiú go mbeidh siad níos éifeachtaí agus go mbainfidh siad na daoine cearta amach.

Údar:

Cé go bhfuil creataí éagsúla againn cheana lena dtugtar aghaidh ar an bhfuath ar leibhéal an Aontais, ní leor an méid atá déanta chun na saoránaigh den Aontas a chur ar an eolas faoi na tionscnaimh sin. Níl a fhios ag formhór na saoránach san Aontas cad iad na cláir, na tionscnaimh agus na rialacháin atá ann ar leibhéal an Aontais agus ar an leibhéal náisiúnta araon. Den chuid is mó, díríonn tuarascálacha, nuacht agus díospóireachtaí maidir leis an bhfuath ar chásanna fuatha agus ar a bhfuil ag dul amú, rud atá tábhachtach ach a chuireann íomhá ghruama chlaonta chun cinn. Dá bhrí sin, ba cheart tuarascálacha dearfacha a bheith ann freisin maidir leis an gcaoi a ndéantar an fuath a chomhrac, mar aon le moltaí praiticiúla maidir leis an méid is féidir le daoine a dhéanamh chun cur ina choinne.

Molaimid feachtas múscailte feasachta, seachas dlí crua nó cód iompair maidir leis an méid is ceadmhach do na tionchairí agus do na meáin ghairmiúla a rá, mar d'fhéadfadh sé go mbreathnófaí ar an gcur chuige sin mar chinsireacht agus d'fhéadfadh sé frithghníomhú agus míshástacht a chruthú i measc daoine a bhfuil tuairimí éagsúla acu agus sa tsochaí i gcoitinne. Trí dhíriú ar fhor-rochtain agus ar mhúscailt feasachta, d'fhéadfaí a chur ar chumas na saoránach tuiscint a fháil ar thábhacht an ábhair agus iad a ullmhú chun rannchuidiú le réitigh a chur i bhfeidhm agus chun cur i gcoinne an fhuatha ina saol féin.

Sonraíochtaí:

Spriocghrúpaí: Tá sé tábhachtach teagmháil a dhéanamh le codanna leathana den tsochaí tríd an bhfeachtas feasachta seo, chun tuairimí an phobail a athrú agus chun a chinntiú gur athruithe inbhuanaithe a bheidh sna hathruithe ar thuairimí agus ar iompar. Cinnteofar leis sin freisin go leanfaidh na daoine a bhíonn ag cur i gcoinne an fhuatha cheana de bheith ag gníomhú dá réir. An tráth céanna, chun a chinntiú go mbeidh na feachtais sin éifeachtach agus go mbeidh tionchar acu, tá sé tábhachtach feachtais agus teachtaireachtaí a shaincheapadh do spriocghrúpaí éagsúla, amhail íospartaigh, comhghuaillithe, leanaí, tuismitheoirí, múinteoirí agus déantóirí coire. Trí na cúiseanna atá le mothúcháin fuafara a mhíniú, is féidir linn cuidiú le daoine a d'fhéadfadh a bheith páirteach i gcaint nó iompar fuafar tuiscint a fháil ar a gcúiseanna agus ar thionchar a ngníomhartha. Ba cheart na feachtais a bheith i dteangacha nach teangacha oifigiúla den Aontas iad freisin, chun teagmháil a dhéanamh le daoine nach bhfuil teanga an stáit acu ina bhfuil cónaí orthu.

Bealaí: Ba cheart úsáid a bhaint as raon leathan bealaí chun oideachas a chur ar an bpobal maidir le cad is caint thoirmiscthe dhochrach fuafar ann agus maidir leis an iompraíocht a mholtar, agus maidir le tionscnaimh agus bearta éagsúla atá ann cheana san Aontas. Sa bhreis ar na meáin shóisialta, cainéil teilifíse agus léirithe scannán, ba cheart don fheachtas úsáid a bhaint as sraith leathan modhanna as líne atá cruthaitheach neamhghnách tarraingteach, mar shampla, cláir fógraí, nuachtáin éagsúla, foilseacháin speisialaithe ar an ábhar (rud a d'fhéadfadh a bheith saor in aisce), leoraithe, raidió, scáileáin sa mheitreo/ar an iompar poiblí, fógráin ollmhargaidh, nuachtáin, admhálacha siopadóireachta (mar a tharla le feachtas Ostarach atá dírithe ar fhoréigean in aghaidh na mban) agus bearta comhchosúla. Go sonrach, d'fhéadfaí scannán saor in aisce ar an ábhar a chraoladh saor in aisce ar fud an Aontais. Cur chuige tábhachtach eile is ea páirt a thabhairt do thionchairí, mar shampla, aisteoirí,

amhránaithe agus daoine sna meáin, sna feachtais múscaillte feasachta chun teagmháil a dhéanamh leis na glúnta óga agus le lucht féachana eile trí úsáid a bhaint as formáidí atá oiriúnach dóibh. Ina theannta sin, molaimid oibriú le tionchairí ar íospartaigh iad féin chun na teachtaireachtaí sin a dhréachtú agus a scaipeadh.

Ábhar: Lena chinntiú go ndéanfar na feachtais a dhearadh go maith, ba cheart páirt a bheith ag gairmithe ó earnálacha éagsúla (fógraíocht, síceolaíocht, grúpaí íospartach, etc.) agus ag grúpa fócais éagsúil ina bhfuil na spriocghrúpaí éagsúla a bhfuil sé d’aidhm ag an bhfeachtas teacht orthu (íospartaigh, tionchairí, daoine óga, srl.) i ndearadh an ábhair. Ba cheart feachtais a shaincheapadh chun cineálacha éagsúla fuatha a chomhrac, mar shampla, in aghaidh mionlach, inimirceach, daoine faoi mhíchumas, an phobail LGBTQI+, na Romach agus na nGiúdach. Ní mór iad a shaincheapadh freisin don staid i dtíortha éagsúla an Aontais agus go gcuirfidís leis na tionscnaimh agus na bearta atá ann cheana. Ba cheart go ndíreoidís freisin ar theachtairachtaí dearfacha lena gcuirtear Aontas Eorpach gan fuath chun cinn agus lena dtugtar eolas faoi bhearta agus tionscnaimh éifeachtacha atá ann cheana in aghaidh an fhuatha. Ba cheart tuilleadh tuarascálacha a bheith ann freisin maidir le gníomhaíochtaí, díospóireachtaí agus tionscnaimh institiúidí an Aontais sa nuacht náisiúnta.

Cur chuige: Ba cheart go mbeadh an feachtas seo tarraingteach greannmhar chun dul i bhfeidhm ar dhaoine agus iad a athrú (i gcodarsnacht leis an dearcadh atá ag formhór na saoránach ar an gcuid is mó d’fheachtais an Aontais). Ba cheart dó díriú freisin ar shaoránaigh a mhealladh ar bhealach níos dírí. Mar shampla, d’fhéadfadh an tAontas tús a chur le comórtais phoiblí nó duaiseanna arb é is aidhm dóibh moltaí na saoránach a chur san áireamh maidir le cineálacha chruthaitheacha éifeachtacha de chur chuige chun feachtais a dhéanamh. Ina theannta sin, ba cheart don fheachtas obair dheonach agus rannpháirtíocht saoránach a spreagadh. Páirt a thabhairt do pháirtithe leasmhara éagsúla, ar nós daoine a bhfuil sé de chumhacht acu a scéalta pearsanta a chomhroinnt agus gnólachtaí móra nó na meáin chumarsáide, ar bhonn deonach. Mar shampla, d’fhéadfadh bainisteoirí oibriú le grúpaí leochaileacha sa tsochaí agus íospartaigh a nascadh le chéile. Ní mór na hacmhainní daonna agus airgeadais is gá chun na cuspóirí sin a bhaint amach a urrú. D’fhéadfadh na feachtais díriú freisin ar fheasacht sa spórt a ardú i measc lúthchleasaithe agus luchtanna féachana trí pháirt a thabhairt do chlubanna, do na meáin agus do pholaiteoirí chun aghaidh a thabhairt ar shaincheist na fuathchainte. Molaimid cineálacha cur chuige níos cruthaithí, níos greannmhair agus níos tarraingtí a úsáid, mar shampla, d’fhéadfadh feachtas a bheith ann le lógó ‘pasta in aghaidh fuatha’ agus cód QR ar an bpasta, nó ar phacáistí bia eile (nó páipéar leithris de rogha air sin), a rachadh chuig eolas faoin tionscnamh, de réir na dtáirgí is mó a bhfuil tóir orthu i ngach Ballstát.

An moladh i mbeagán focal:

- An feachtas a dhíriú ar an bpobal i gcoitinne mar aon le grúpaí sonracha tábhachtacha eile (mar shampla, íospartaigh, déantóirí coire, leanaí) le sraith teachtaireachtaí a shaincheaptar do na grúpaí éagsúla sin agus do chomhthéacs Bhallstáit éagsúla an Aontais.
- Ba cheart go gcuirfeadh i dtábhacht freisin leis an bhfeachtas an fhreagracht atá ar shaoránaigh uile an Aontais cur i gcoinne an fhuatha a gcasann siad air ina saol féin agus oibriú in aghaidh an fhuatha sin, trí uirlisí agus eolas praiticiúil a chur ar fáil maidir leis an gcaoi ar féidir leo é sin a dhéanamh.

- Bealaí cumarsáide traidisiúnta agus neamhghnácha araon a úsáid as líne agus ar líne chun na teachtaireachtaí frithfhuatha a scaipeadh chun teacht ar fho-chodanna éagsúla den tsochaí trí bhealaí níos éifeachtaí agus níos áisiúla don úsáideoir.
- Páirt a thabhairt do na meáin thraidisiúnta agus na meáin shóisialta, mar aon le tionchairí agus guthanna na n-íospartach, i ndréachtú agus i gcomhroinnt na dteachtaireachtaí sin chun a chinntiú go mbeidh siad níos éifeachtaí agus go mbainfidh siad na daoine cearta amach.

Moladh 6: Fóirithint fógraí in aghaidh an fhuatha

Molaimid go ndéanfaí an straitéis chumarsáide seo a leanas a chur san áireamh chun an fuath a chomhrac:

- Téacsteachtaireachtaí gearra gutháin maidir le cuimsitheacht do gach saoránach (mar shampla, iad a fháil ar bhonn seachtainiúil/míosúil);
- Póstaeir ag stadanna bus a chuireann an chuimsitheacht chun cinn;
- Cláir fógraí mhóra dóibh siúd atá bréan de na meáin shóisialta, mar shampla, cláir fógraí thoghcháin an Aontais a úsáid le haghaidh teachtaireachtaí dearfacha ar chaint fhrithfhuatha;
- Fógraí Google maidir le fuath a chomhrac, má roghnaíonn tú a bheith páirteach;
- Emoji agus méimeanna a chruthú le haghaidh teachtaireachtaí frithfhuatha;
- Nótaí dearfacha a chur le teachtaireachtaí oifigiúla atá ann cheana (ar nós doiciméad rialtais);
- Físeáin feasachta a léiriú ar an teilifís, nó i bpictiúrlanna roimh scannán (atreisiú dearfach a dhéanamh de nuair is féidir);
- Taispeántais oscailte ag imeachtaí spóirt (na Cluichí Oilimpeacha nó Corn an Domhain mar shampla) a úsáid chun feasacht a scaipeadh, cuir i gcás, Banríon Shasana le Paddington Bear ag na Cluichí Oilimpeacha i Londain, rud a bhí ina ábhar oiriúnach/croíúil;
- Físeáin níos faide a sheinm ag imeachtaí spóirt agus ‘cleas’ iontu, is é sin an t-imreoir ábhartha a bheith páirteach san fhíseán féin (e.g. peileadóir ag cluichí peile);
- Feachtais ina bhfuil daoine mór le rá/tionchairí (Pommélien sa Bheilg, mar shampla) chun feasacht a mhúscailt ar ábhair a bhaineann le fuath.

Údar:

Beidh an méid seo a leanas ann dá thoradh sin:

- Timpeallacht meán sóisialta níos sláintiúla agus níos sábháilte, cineál eile meán sóisialta, ceann atá níos idirphearsanta.
- Sochaí níos sláintiúla, níos feasaí agus níos sona.
- Eoraip níos fearr agus níos lú deighilte inti.
- Staid ina seachnaítear géarú agus ina bhfeictear ar rudaí ina gceart.

An moladh i mbeagán focal:

- Cumarsáid iomlánaíoch do gach aoisghrúpa ar bhealaí digiteacha chun comhbhá, cuimsiú agus glacadh le grúpaí/daoine aonair ó chúlraí éagsúla a chur chun cinn.
- An gá atá le saineolaithe cumarsáide chun an t-ábhar agus an straitéis a dhearadh do na hardáin éagsúla agus do na spriocghrúpaí éagsúla.

- Cumarsáid a dhéanamh go hindíreach/go hintuigthe, mar shampla, ‘meas’ a léiriú trí chliceáil ar chnaipe, cosúil le emoji na hordóige.

Moladh 7: Ardán uile-Aontais a chruthú ina dtugtar le chéile eolas, acmhainní, bearta agus córais tacaíochta maidir le fuath

Molaimid ardán a chruthú a bheidh á reáchtáil ag an Aontas agus a bheidh éasca a nascleanúint agus saor in aisce, lena soláthrófar rochtain ar ábhair eolais, ar nós sainmhínte, alt, físeán, agus tionscnamh eile ó eagraíochtaí atá dírithe ar chur i gcoinne an fhuatha. Ba cheart an stíl agus struchtúr an ardáin a bheith áisiúil don úsáideoir. Dá réir sin, d’fhéadfadh rannán a bheith ann a dhíreodh ar dhaoine óga le heolas faoi shaincheisteanna a d’fhéadfadh a bheith rompu ina saol laethúil agus leideanna praiticiúla san áireamh ina leith. Ba cheart díriú ar na bearta lenar tugadh cuidiú go rathúil le híospartaigh agus ar chomhairle phraiticiúil do dhaoine ar fud na sochaí maidir leis an gcaoi ar féidir leo tacú go héifeachtach le híospartaigh, go háirithe i gcásanna laethúla ina bhféadfadh siad iompar fuafar a fheiceáil. Ba cheart do dhaoine a bheith in ann nascadh le daoine eile a bhfuil fadhbanna comhchosúla acu agus tacú leo freisin. Thairis sin, d’fhéadfaí sainmhíniú na faidhbe, moltaí agus gach ábhar ábhartha ón bPainéal Saoránach Eorpach maidir leis an bhfuath sa tsochaí a chomhrac a chur san áireamh ar an ardán.

Chun éifeachtacht a chinntiú, is féidir an intleacht shaorga a úsáid chun cuidiú le daoine idirghníomhú leis ar bhealach níos nádúrtha agus teacht ar ábhar ábhartha, e.g. treoir agus moltaí a sholáthar d’íospartaigh agus do chomhghuaillithe agus iad a chur ar aghaidh chuig na bealaí agus na heagraíochtaí cearta le haghaidh tacaíochta. Thairis sin, d’fhéadfadh roghanna áirithe a chur san áireamh ar an ardán d’úsáideoirí chun aiseolas sonrach a sholáthar maidir leis na hacmhainní a bhí cabhrach agus conas a d’fhéadfaí é a fheabhsú a thuilleadh.

Thairis sin, ba cheart don suíomh gréasáin sin daoine a spreagadh, a chumasú agus a chumhachtú chun smaoineamh go criticiúil ar na saincheisteanna sin seachas a bheith róshriantach nó teanntásach, rud a d’fhéadfadh daoine a chur ó dhoras. D’fhéadfadh an méid sin a bheith ábhartha go háirithe do dhéantóirí coire nó do dhaoine atá níos oscailte don fhuathchaint agus do theachtaireachtaí fuatha, chun smaointeoireacht chriticiúil agus bailiú eolais a spreagadh. Ba cheart tacaíocht agus modhnóireacht a sholáthar chun saoirse cainte a chinntiú, díospóireachtaí cuiditheacha a éascú, rialú ábhair a fheidhmiú, agus géarú a chosc.

D’fhéadfadh cuideachtaí móra meán sóisialta cúnamh a thabhairt maidir le feidhm a chur chun feidhme ina n-atreorófaí úsáideoirí chuig an ardán chun tacaíocht a fháil má cheapann siad go bhféadfadh fuath a bheith i bpostálacha áirithe. D’fhéadfadh cláir atreoraithe nó córais luaíochta a bheith ann a nascann leis an suíomh gréasáin ba cheart a bheith cruthaitheach agus tarraingteach d’fhochodanna éagsúla den daonra.

Údar:

Is é is aidhm don mholadh seo ardán a chruthú nach dtagann in ionad smaointe comhchosúla, ach a chruthaíonn bunachar sonraí d’acmhainní úsáideacha. Dá bhrí sin, ba cheart an t-ardán a idirnascadh le suíomhanna gréasáin eile atá ann cheana, le hacmhainní maidir le fuath agus le bealaí tacaíochta d’íospartaigh an fhuatha agus do ghrúpaí an-leochaileacha chun é a dhéanamh chomh héasca agus chomh cabhrach agus is féidir. Aidhm eile den ardáin is ea feasacht a mhúscailt agus rannpháirtíocht chomhfhiosach le hacmhainní ábhartha a chur chun cinn. Cé go bhfuil an iliomad tionscnamh, acmhainní agus feachtas éagsúil ann, níl a fhios ag formhór na ndaoine cén áit leis an eolas agus an cuidiú sin ar fad a fháil. D’fhéadfaí é sin a chumasú trí ardán lárnach amháin ina bhféadfadh daoine teacht ar an eolas sin go léir. D’fhéadfadh feachtas feasachta a bheith ag an suíomh gréasáin freisin.

Ar an ardán, d'fhéadfadh malartuithe duine le duine (trí fheidhm chomhrá mar shampla) cuidiú le daoine mothúcháin, taithí agus bacainní éagsúla a thuiscint i bhfíor-am i gcompord a dtithe féin. D'fhágfadh sé sin go bhféadfadh íospartaigh a n-eispéireas a chomhroinnt freisin agus teagmháil a dhéanamh le duine a d'fhéadfadh cuidiú leo mothú níos fearr, agus a n-imní a mhaolú ar an gcaoi sin.

Dúshlán amháin don ardán seo is ea go bhféadfadh sé a bheith deacair é a chur i bhfeidhm agus a chinntiú go bhfuil struchtúr an tsuímh gréasáin éasca a thuiscint, a rochtain agus a nascleanúint do na saoránaigh. Ar an dóigh chéanna, beidh sé dúshlánach an suíomh gréasáin a dhéanamh suimiúil go leor ionas go dtabharfadh cuid mhór saoránach den Aontas cuairt air as a stuaim féin. Thairis sin, cé go bhfuil an painéal ar an eolas faoi na dúshláin a bhaineann le suíomh gréasáin den sórt sin a chruthú sna teangacha go léir atá ag teastáil, creidimid gur iarracht fhiúntach a bheadh ann. Más féidir le daoine scéalta pearsanta íospartach a chomhroinnt ar an suíomh gréasáin, d'fhéadfadh sé sin a bheith ní ba mhealltaí agus ní b'éifeachtaí ó thaobh mothúcháin de. Is feiniméan é an fuath a bhí ann roimh an idirlíon, cé go bhféadfadh sé gur in olcas a chuaigh cúrsaí mar gheall ar an idirlíon, agus ní féidir le haon ardán amháin é a réiteach go héasca. Creideann an painéal, áfach, go bhféadfadh an t-ardán a bheith ina bhealach éifeachtach chun feasacht agus eolas a mhéadú faoi leitheadúlacht an fhuatha, ach chun daoine a ullmhú freisin chun an fuath a fheiceann siad as líne agus ar líne araon a leasú agus déileáil leis.

An moladh i mbeagán focal:

- Molaimid ardán a sheoladh a mbeidh rochtain éasca air agus a bheidh á reáchtáil ag an Aontas agus a fheidhmeoidh mar ionad ilfhreastail chun eolas, sainmhínte ar phríomhthéarmaí, sonraí maidir le héifeachtaí diúltacha an fhuatha, acmhainní praiticiúla agus ábhartha, naisc chuig ardáin eile, tionscnaimh eile agus eagraíochtaí eile, mar aon le forbhreathnú ar na bearta agus na córais tacaíochta atá ann cheana i mBallstáit éagsúla a sholáthar.
- Ba cheart an t-ardán a chomhtháthú le bearta, ardáin agus suíomhanna gréasáin eile atá ann cheana atá dírithe ar chur i gcoinne an fhuatha ar an leibhéal náisiúnta agus ar leibhéal an Aontais ionas go mbeidh sé chomh héasca agus is féidir d'úsáideoirí teacht ar an eolas agus ar an tacaíocht a theastaíonn uathu agus gan iarrachtaí a dhúbláil.
- D'fhéadfaí an suíomh gréasáin a úsáid freisin mar chuid den fheachtas múscaillte feasachta agus ba cheart é a fhógairt go gníomhach trí na meáin shóisialta, trí fhógraí teilifíse agus trí bhealaí meán ollchumarsáide eile.

Ról na meán agus na polaitíochta

Moladh 8: Coiste iontaobhais neamhspleách a bhunú

Molaimid coiste iontaobhais neamhspleách a bhunú chun cód iompair a bhunú d'fheisirí Pharlaimint na hEorpa agus monatóireacht a dhéanamh ar an bhfuathchaint agus ar an mífhaisnéis. Ba cheart saineolaithe ildisciplíneacha (mar shampla saoránaigh, saineolaithe dlí, síceolaithe, socheolaithe, eagraíochtaí neamhrialtasacha agus saineolaithe polaitiúla) a bheith ar an gcoiste iontaobhais agus ba cheart do na saoránaigh sin a mhaoirsiú. Chun ionadaíocht leathan a chinntiú, is go randamach a roghnófar na saoránaigh – agus forfheidhmeofar critéir chun ionadaíocht grúpaí leochaileacha sa tsochaí a fheabhsú. A luaithe a bhunófar é, pléifidh an coiste cód iompair a bheidh infheidhme maidir le hoifigigh phoiblí agus údarais phoiblí agus

déanfaidh sé cinneadh ina leith. Tá an cód iompair inathraithe. Bainfidh an coiste iontaobhais úsáid as an gcód iompair chun sonraí a bhailiú, monatóireacht a dhéanamh ar an gcur i bhfeidhm agus treoirínite breise a fhorbairt maidir leis an bhfuathchaint a shainaithint agus a chomhrac. Beidh pointe teagmhála oifigiúil ag an gcoiste iontaobhais le saoránaigh eile den Aontas freisin, chun sárúithe agus fuathchaint ó pholaiteoirí a thuairisciú. Déanfaidh na comhaltaí sealaíocht ar a chéile chun iolrachas i measc an choiste a chinntiú. Chun ionracas an choiste a choinneáil, forfheidhmeoidh sé rialacha docta maidir le ballraíocht sa choiste iontaobhais chun coinbhleachtaí leasa na gcomhaltaí a chosc.

Údar:

Tá gá le coiste iontaobhais a dhéanann monatóireacht, rianú agus forbairt ar chur i bhfeidhm cód iompair in aghaidh fuathchainte, chun daoine aonair agus pobail a chosaint ar thionchar dhíobhálacha na fuathchainte, go háirithe ó oifigh agus údarais phoiblí. Trí chód iompair cuimsitheach a fhorbairt bunaithe ar ionchur ó shaineolaithe dlí, síceolaithe, socheolaithe, saoránaigh agus ó dhaoine eile, is féidir leis an gcoiste sin treoirínite soiléire agus ionchais maidir le hiompraíocht a shocrú. Tá coiste iontaobhais den sórt sin ríthábhachtach chun muinín in institiúidí agus in ionadaithe a fháil ar ais agus a chothú. Cinntítear níos mó trédhearcachta trí chód iompair maidir le hiompraíocht mhuiníneach a chur i bhfeidhm agus monatóireacht a dhéanamh air. Gníomhóidh an coiste go neamhspleách agus go trédhearcach agus is iad na saoránaigh a dhéanfaidh maoirseacht air, rud a mhéadaíonn a dhlisteanacht. Chun bheith éifeachtach, ní mór foireann ildisciplíneach atá curtha le chéile go maith a bheith ag an gcoiste, rud a dhéanfaidh ionadaíocht ar dhearcthaí éagsúla agus ar ghrúpaí leochaileacha.

An moladh i mbeagán focal:

- Coiste iontaobhais neamhspleách a bhunú chun cód iompair d'oifigh phoiblí an Aontais a chruthú agus a fhorfheidhmiú, lena dtabharfar aghaidh ar an bhfuathchaint agus ar an mífhaisnéis.
- Beidh saineolaithe ildisciplíneacha agus saoránaigh a roghnófar go randamach san áireamh ar an gcoiste, lena gcinnteofar ionadaíocht ar ghrúpaí leochaileacha.
- Déanfaidh an coiste monatóireacht ar chur i bhfeidhm an chóid iompair, baileoidh sé sonraí, agus láimhseálfadh sé tuarascálacha ar fhuathchaint ó pholaiteoirí.

Le maoirseacht na saoránach agus sealaíocht na gcomhaltaí ionracas, déanfar trédhearcacht agus dlisteanacht an choiste a choinneáil ar bun.

Moladh 9: Iontaofacht, fíorais agus trédhearcacht: Maoiniú eolais a fhíorú agus a shoiléiriú

Molaimid a cheangal ar na meáin oibriú i gcomhar le heagraíochtaí neamhspleácha seiceála fíricí, a bheith trédhearcach maidir lena bhfoinsí maoinithe, saoránaigh a spreagadh chun an t-eolas a fhaigheann siad a fhíorú, agus tionchar polaitiúil lucht féachana na meán a theorannú, tríd an méid seo a leanas a dhéanamh:

- Prótacail dhiana a bhunú chun eolas a fhíorú agus a dheimhniú do dhaoine aonair, do chomhlachais agus do chuideachtaí a bhfuil cuspóir tráchtála acu agus/nó a úsáideann cistí poiblí (e.g. chun a stádas dlíthiúil a nochtadh);
- Meáin neamhspleácha le haghaidh éagsúlacht foinsí níos fearr, maoiniú staidéar deimhniúcháin agus tairbhíthe scaipthe eolais a fhoilsiú;
- Feachtais a sheoladh chun feasacht a mhúscailt i measc na saoránach maidir leis an tábhacht a bhaineann le heolas a fhíorú;

- Teorainn a chur leis an líon eagraíochtaí meán is féidir a bheith ag duine nó ag cuideachta amháin (raidíó, teilifís, ardáin shóisialta, nuachtáin, etc.);
- Ní mór uirlis ‘Bosca Dubh’* a bheith inrochtana go héasca ag an bpobal agus a bheith éigeantach do dhaoine nó do chuideachtaí a bhfuil cuspóir tráchtála acu nó a maoiníonn tríú páirtí iad; cuirfear smachtbhannaí ar na daoine nó ar na cuideachtaí sin de réir a láimhdeachais dhomhanda i gcás scaipeadh deonach bréagnuachta/fuathchainte.

Údar:

Le scaipeadh na mífhaisnéise, cothaítear deighiltí agus fuath inár sochaí. Trína chinntiú go bhfíoraíonn comhlachtaí neamhspleácha an t-eolas agus trí na meáin neamhspleácha a mhaoiniú, is féidir linn míthuiscintí agus ionramháil a laghdú. Leis an trédhearcacht maidir le foinsí maoinithe do na meáin a bhaineann tairbhe as scaipeadh eolais, neartaítear muinín an phobail sna meáin. Thairis sin, tá sé ríthábhachtach saoránaigh a spreagadh chun dearcadh níos fiosaí agus níos criticiúla a ghlacadh i leith an eolais a fhaigheann siad chun go mbeidh sochaí níos feasaí agus níos acmhainní ann i bhfianaise na mífhaisnéise. Cuidíonn na cuir chuige sin le sochaí níos aontaithe a chur chun cinn agus le hiolrachas guthanna a chinntiú i spás na meán.

** ‘Bosca Dubh’ i gcoinne Mediapart sa Fhrainc: trédhearcacht foinsí, próiseas fíorúcháin, modheolaíocht taighde, comhthéacsanna agus teorainneacha, úinéireacht na meán, agus maoiniú na meán.*

An moladh i mbeagán focal:

- Gach eolas is gá a chur san áireamh le haghaidh trédhearcacht na meán
- Tacú le maoiniú meán neamhspleách chun iolrachas na meán a chur chun cinn
- Teorainn a chur le húinéireacht chomhchruinnithe meán

Moladh 10: Casann an Eoraip ort: Meáin rannpháirteacha do na saoránaigh

Molaimid rannpháirtíocht na saoránach a mhéadú chun ábhar na meán a dhlisteanú agus chun cultúr comhroinnte frithpháirteachais agus urraime a chothú lena gcuirfear deireadh leis an bhfuath. Beidh an rannpháirtíocht sin bunaithe ar thrí bhealach a thiocfaidh lena chéile, mar atá:

1. Eagraíocht meán rannpháirteach ina gcuireann saoránaigh le roghanna eagarthóireachta. Beidh an córas sin bunaithe ar líonraí agus cuideachtaí atá ann cheana, idir phoiblí agus phríobháideach, a dhreasófar chun eolas ardcháilíochta a fhoilsiú trí chistí nua. Beidh luach ar na bealaí áitiúla go háirithe mar na bealaí is gaire do na saoránaigh, mar aon le painéil saoránach ar an leibhéal áitiúil agus náisiúnta chun a dtosaíochtaí sna réimsí sin a thuiscint;
2. Fóram le haghaidh díospóireachtaí i bhfoirm bealaigh mheán sóisialta agus aip tharraingteach áisiúil don úsáideoir a chosnófar le rialacha trédhearcachta;
3. Stór comhoibritheach ar líne ina stórálfar nuacht agus plé ar ardchaighdeán chun é a chur ar a gcumas do na saoránaigh stair chomhroinnte a fhorbairt le haghaidh oideachas na hóige agus dul chun cinn i bpríomhábhair le haghaidh thodhchaí an Aontais.

Cuirfidh an córas sin luachanna an Aontais in iúl in aghaidh na fuathchainte, luachanna a sainíodh roimhe seo i gcairt choiteann. Déanfaidh comhlacht a bhfuil feidhmeanna

ombudsman aige agus coiste eitice ábhar a scagadh lena chinntiú go bhfuil sé ag teacht leis na luachanna sin; tá machnamh le déanamh freisin ar an bhféidearthacht an intleacht shaorga a úsáid. Ar deireadh, déanfaidh rogha coiste saoránach monatóireacht ar chur i bhfeidhm an chórais sin agus cinnteoidh siad nach ndéanfar leasanna eacnamaíocha nó idé-eolaíocha a chur i gcion ar roghanna eagarthóireachta.

Údar:

Tá an moladh sin tábhachtach toisc go gcuimsítear ann go díreach na saoránaigh, rud a dhlisteanáíonn institiúidí an Aontais iad féin trí dhaonlathas díreach. Cuirfidh sé ar chumas na saoránach eolas a fháil faoi cibé rud is mian leo agus gan bheith faoi thionchar polaitiúil, mar shampla, chun aontú lena rialtas náisiúnta. Tá aird ar leith dírithe ar dhaoine óga mar go measann an córas meán seo freisin modhanna cumarsáide atá níos gaire dóibh ná na cainéil teilifíse thraidisiúnta. Ar an gcaoi chéanna, is féidir leanaí a chur san áireamh trí ábhar saincheaptha ar nós cúrsaí nó cluichí oideachais, de réir a n-aoise. Creidimid go bhfuil an córas sin tábhachtach chun deireadh iomlán a chur leis an mbréagaisnéis agus leis an bhfuathchaint toisc go mbeidh sé ina ardán meán nach n-iompraíonn teachtaireachtaí fuatha. Mar is eol dúinn, tá baol ann nach n-úsáidfí daoine an córas seo agus, mar sin, beidh orainn a chinntiú go mbeidh sé tarraingteach mealltach trí chistí cuí a infheistiú sa chóras.

An moladh i mbeagán focal:

- Rannpháirtíocht saoránach a mhéadú chun an fhuathchaint a chomhrac trí na meáin.
- Cur chuige trí phointe: eagraíocht meán, bealach meán sóisialta, agus stór comhoibritheach ar líne.

Monatóireacht agus scagadh trí chur chuige iltaobhach: comhlacht ombudsman, coiste eitice, agus coiste maoirseachta saoránach.

Digiteach agus teicneolaíocht

Moladh 11: An bhoilgeog a phléascadh: Dearcthaí éagsúla a chur chun cinn ar na meáin shóisialta

Chun an radacú ar líne a chomhrac, molaimid go dtabharfaí sainordú d'ardáin meán sóisialta an t-ábhar a thaispeántar d'úsáideoirí a éagsúlú. Is minic a chruthaíonn algartaim bothanna macallaí, a bhrúnn ábhar claonta agus a threoraíonn úsáideoirí chuig ábhar den chineál céanna. Trí algartaim a choigeartú chun raon níos leithne dearcthaí a chur i láthair, is féidir linn ceannasacht aon dearcadh aonair a chosc agus tuiscint níos cothroime ar ábhair a chur chun cinn.

Cén chaoi? Cinntítear leis an réiteach a bheartaímid, nuair a fhéachann úsáideoirí ar ábhar antoisceach, go dtaispeánfaidh an t-algartam ábhar ó dhearcthaí contrártha ina dhiaidh sin. Leis an gcur chuige sin, spreagtar úsáideoirí chun insint níos caolchúisí agus níos cuimsithí a fheiceáil, rud a phléascfaidh na mboilgeog ábhair atá á n-aonrú faoi láthair ar bhealach éifeachtach.

Ní hamháin go laghdófar baol an radacaithe leis an straitéis sin, ach cothófar smaointeoireacht chriticiúil agus comhbhá léi freisin trí thuairimí éagsúla a nochtadh d'úsáideoirí. Tríd an athrú sin a chur i bhfeidhm, beidh na meáin shóisialta ina spás níos eolasaí agus níos cothroime, rud a chuirfidh le timpeallacht níos sláintiúla ar líne do chách.

Údar:

Smaointeoireacht chriticiúil fheabhsaithe: Trí dhearcthaí éagsúla a nochtadh d'úsáideoirí, cothaítear smaointeoireacht chriticiúil agus spreagtar daoine aonair chun meastóireacht níos críochnúla a dhéanamh ar eolas, rud a laghdaíonn so-ghabháltacht i leith idé-eolaíochtaí radacacha.

Deighilt laghdaithe: Trí bhothanna macallaí a bhriseadh síos, is féidir leis an gcur chuige sin deighilt shochaíoch a laghdú, agus idirphlé agus tuiscint a chur chun cinn idir grúpaí éagsúla.

Pobal feasach: Le rogha eolais níos cothroime, cinntítear go mbíonn an pobal níos feasaí faoi shaincheistean éagsúla, as a dtiocfaidh plé níos caolchúisí agus cinnteoireacht níos tuisceanaí.

Meabhairshláinte fheabhsaithe: Nuair a thógtar isteach ábhar éagsúil, is féidir imní agus strus a laghdú a bhaineann le heolas athráiteach a d'fhéadfadh a bheith gríosaitheach.

Neartú daonlathach: Is fearr is féidir le sochaí a léirítear dearcthaí éagsúla do na daoine inti páirt a ghlacadh i bpróisis dhaonlathacha, agus daonlathas níos sláintiúla agus níos athléimní á chothú.

Tríd an moladh sin a chur i bhfeidhm, beidh na meáin shóisialta ina n-ardán oideachais agus plé cuiditheach, rud a fhágfaidh go mbeidh sochaí níos feasaí, níos comhtháite agus níos comhbháiche ann ar deireadh.

An moladh i mbeagán focal:

- Ábhar a éagsúlú: Sainordú a thabhairt d'ardáin meán sóisialta algartaim a choigeartú chun raon níos leithne dearcthaí a chur i láthair, lena gcuirfear i gcoinne bothanna macallaí agus ábhar claonta.
- Tuairimí cothroma: A chinntiú go gcuirtear an t-algartam chun dearcthaí contrártha a thaispeáint ar siúl nuair a bhreathnaítear ar ábhar antoisceach, rud a chuirfidh tuiscint chaolchúiseach chun cinn.
- Radacú a laghdú: Leis an straitéis sin, laghdaítear baol an radacaithe trí úsáideoirí a nochtadh do thuairimí éagsúla, rud a chothaíonn smaointeoireacht chriticiúil agus comhbhá.

Timpeallacht níos sláintiúla ar líne: Ach na hathruithe sin a chur chun feidhme, cruthófar spás níos eolasaí, níos cothroime agus níos sláintiúla ar líne do gach úsáideoir.

Moladh 12: Aghaidh a thabhairt ar anaithnideacht ar líne chun an fuath a chomhrac

Molaimid go rialófar anaithnideacht ar líne ionas gur fearr a dhéanfaidh na húdaráis iomchuí déantóirí coire na fuathchainte a rianú, a imscrúdú agus a thabhairt chun cuntais.

Dá bhrí sin, molaimid an méid seo a leanas:

- Go ndéanfaidh an tAontas Eorpach agus na Ballstáit cur i bhfeidhm rialachán agus reachtaíocht atá ann cheana agus a bheidh ann amach anseo a fhorfheidhmiú;
- Córas fíordheimhnithe céannachta a chur ar bun ar leibhéal gach Ballstáit, ina mbaileofar an t-íosmhéid eolais is gá chun duine a shainithint trí thairseach a bhainistíonn an rialtas. Ba cheart é sin a chomhchuíbiú de réir a chéile ar leibhéal na mBallstát;
- Ceanglas go n-oibreodh na hardáin meán sóisialta is tábhachtaí i gcomhar níos fearr le húdaráis Eorpacha agus náisiúnta maidir le reachtaíocht atá ann cheana agus a bheidh ann amach anseo a chur i bhfeidhm agus maidir le húsáid an chórais fíordheimhnithe céannachta;

- Feasacht a mhúscailt d'úsáideoirí ar líne maidir lena bhfreagrachtaí agus ábhar á phostáil acu trí Chairt Iompair Eorpach nua, a chuirfear chun feidhme ar fud na n-ardán meán sóisialta is tábhachtaí agus trí eintitis phoiblí, scoileanna agus grúpaí pobail.

Údar:

Tá an moladh sin tábhachtach toisc go bhfuil méadú suntasach ar an bhfuathchaint, go háirithe ar líne. Dá ndéanfaí anaithnideacht a rialáil, bheadh déantóirí coire fuatha ar líne níos inaitheanta agus níos cuntasáí.

Mar sin féin, ní mór anaithnideacht a chosaint bunaithe ar thuiscintí atá ann faoi láthair ar shaoirse cainte, lena ráthaítear saormhalartú dearchtaí agus tuairimí ar líne.

An moladh i mbeagán focal:

- Cuntasacht ar líne a bhaint amach.
- Rialacháin agus reachtaíocht a dhéanamh níos éifeachtúla.
- Córas fíordheimhnithe Eorpach a chur chun feidhme.
- Feasacht a mhúscailt maidir le hiarmhairtí na fuathchainte.

Moladh 13: Cáta Scimeála Sábháilte an Aontais

Molaimid Cáta Scimeála Sábháilte Eorpach a thabhairt isteach do leanaí ó 8 mbliana ar aghaidh. Bheadh an cáta sin ar fáil freisin i leagan oiriúnaithe d'aoisghrúpaí níos sine. Leis an gcáta sin, gheobhaidh leanaí na scoileanna is gá chun an t-idirlíon a nascleanúint go neamhspleách agus go sábháilte agus chun déileáil le hábhar fuafar ar líne. I gcúrsa oiliúna a reáchtálfaidh eagraíochtaí sochaí sibhialta i scoileanna, d'fhoghlaimeodh leanaí ar bhealach a bheadh oiriúnach dá n-aois, i measc nithe eile:

- Conas is féidir liom ábhar fuatha a aithint agus a fhreagairt?
- Cad dó a gcaithfidh mé a bheith ag faire amach chun nach scaipfinn féin ábhar fuatha (i ngan fhios dom)?
- Cé leis ar féidir liom teagmháil a dhéanamh má bhím ag fulaingt an fhuatha?
- Cá bhfuil teorainneacha an phríobháideachais?

Ba cheart an oiliúint a bheith spráúil aoisoiriúnach. Ba cheart tacú leis na hoiliúnóirí (eagraíochtaí sochaí sibhialta, eagraíochtaí neamhrialtasacha, etc.) le cistiú iomchuí riachtanach ón Aontas agus ó na Ballstáit. Ba cheart caighdeáin choiteanna maidir le téarmaíocht a sholáthar do na hoiliúnóirí freisin. Nuair a bheidh an oiliúint curtha i gcrích ag na páistí, gheobhaidh siad Cáta Scimeála Sábháilte an Aontais. Ar an leibhéal náisiúnta, ba cheart do thuismitheoirí agus do mhúinteoirí a bheith páirteach i gcur chun cinn agus i gcur i bhfeidhm an chárta (agus cineál deonach an chárta á chur san áireamh), agus, an tráth céanna, ar leibhéal an Aontais ba cheart cur chun cinn Chárta Scimeála Sábháilte an Aontais a bheith éigeantach i ngach Ballstát. Ina theannta sin, ba cheart a scrúdú an bhféadfaí rochtain ar ábhar áirithe ar an idirlíon a nascadh le Cáta Scimeála Sábháilte an Aontais a fháil. Ba cheart deis a bheith ag leanaí a bhfuil Cáta Scimeála Sábháilte an Aontais faighte acu líonrú a dhéanamh ar líne le leanaí eile ó gach cearn den Aontas.

Réasúnú:

Measaimid go bhfuil an smaoineamh éifeachtach toisc go mbeadh leanaí óga, go háirithe, bródúil as Cárta Scimeála Sábháilte an Aontais a bheith acu (cosúil le ceadúnas rothair). Leis an gcárta, beidh sé níos fusa do thuismitheoirí nach mbíonn na scileanna is gá acu go minic lena gcuid páistí a ullmhú chun an t-idirlíon a úsáid go sábháilte. Is féidir leo coinníollacha éagsúla a chur leis an gcárta a fháil chomh maith (e.g. rochtain ar chluiche sonrach ar líne). Agus ar deireadh, cinnteofar le tabhairt isteach Chárta Scimeála Sábháilte an Aontais go mbeidh malartú idirchultúrtha tairsí ísle idir leanaí san Eoraip, rud a chuireann caoinfhulaingt agus comhbhá chun cinn.

An moladh i mbeagán focal:

- Cárta Scimeála Sábháilte an Aontais a thabhairt isteach do leanaí 8+, agus cúrsaí oiliúna faoi shábháilteacht idirlín agus faoi ábhar fuafar a láimhseáil, arna soláthar ag eagraíochtaí sochaí sibhialta.
- Maoiniú ón Aontas agus comhchaighdeáin d'oiliúnóirí a chinntiú, ina mbeidh thuismitheoirí agus múinteoirí páirteach i gcur chun cinn an chárta.
- An cárta a bhronnadh nuair a bheidh an oiliúint curtha i gcrích, rud a d'fhéadfadh a nascadh le rochtain ar ábhar áirithe ar líne.
- Malartú idirchultúrtha agus líonrú i measc leanaí ar fud an Aontais a chur chun cinn, rud a chothódh caoinfhulaingt agus comhbhá.

Moladh 14: Modhnú intleachta saorga (IS) Na Meáin shóisialta a chosaint ar an bhfuathchaint

Molaimid uirlis IS a fhorbairt chun fuathchaint neamhdhleathach ar ardáin meán sóisialta a bhrath, lena gcinnteofar comhlíonadh chaighdeáin an Aontais. Feidhmeoidh an uirlis seo mar seo a leanas:

Brath agus marcáil:

- An fhuathchaint a bhrath bunaithe ar shainmhíniú an Aontais ar fhuathchaint neamhdhleathach;
- Postálacha a bhféadfadh fuathchaint a bheith i gceist leo a mharcáil agus an cruthaitheoir a chur ar an eolas;
- Modhnóir daonna athbhreithniú a dhéanamh ar phostálacha a bhfuil bratach curtha leo laistigh de 24 uair an chloig;
- Scaoileadh le postálacha a thagann faoi shaoirse cainte;
- Postálacha ina bhfuil fuathchaint neamhdhleathach a chur ar aghaidh chuig na húdaráis lena n-ionchúiseamh agus a scriosfar ina dhiaidh sin.

Brath réamhphostála:

- An fhuathchaint a bhrath sula dtéann an t-ábhar beo;
- Fógra a thabhairt do chruthaitheoirí más cosúil go bhfuil fuathchaint neamhdhleathach i gceist lena bpostálacha;
- Deis a thabhairt do chruthaitheoirí athbhreithniú a dhéanamh ar an ábhar, sin nó an t-ábhar a phostáil ar aon nós;
- Má phostáiltear é, fanfaidh bratach ar an ábhar go dtí go ndéanfaidh duine athbhreithniú air, agus rabhadh ann faoi dhlíthiúlacht agus iarmhairtí na fuathchainte a phostáil.

Le cur i bhfeidhm éigeantach na huirlise sin ar fud na meán sóisialta san Aontas, feabhsófar sábháilteacht ar líne, cosnófar pobail imeallaithe, agus cinnteofar go gcomhlíonfar rialacháin maidir leis an bhfuathchaint, agus cothófar timpeallacht dhigiteach níos urramaí.

Údar:

Cosaint fheabhsaithe: Leis an uirlis IS sin, soláthrófar cosaint láidir do ghrúpaí imeallaithe tríd an bhfuathchaint a bhrath agus a mhaolú sular féidir léi díobháil a dhéanamh. Trí ábhar neamhdhleathach a shainaithint agus a bhaint anuas go pras, cruthóimid timpeallacht níos sábháilte ar líne.

Éifeachtúlacht agus cruinneas: Leis an meascán de bhrath IS agus den athbhreithniú daonna, cinnteofar cruinneas ard maidir leis an bhfuathchaint a shainaithint agus an tsaoirse cainte a urramú an tráth céanna. Leis an bpróiseas athbhreithnithe 24 uair an chloig, déanfar cothromaíocht idir luas agus críochnúlacht, rud a dhéanfaidh leathadh ábhair dhíobhálaigh a íoslaghdú.

Cuntasacht: Trí fhógra a thabhairt do chruthaitheoirí ábhair faoin bhfuathchaint a d'fhéadfadh a bheith ann agus na himpleachtaí dlíthiúla, cuirfear cuntasacht agus feasacht chun cinn leis an uirlis. Cuirfear oideachas ar úsáideoirí faoi cad is fuathchaint neamhdhleathach ann, rud a spreagfaidh cumarsáid níos tuisceanaí agus níos urramaí.

Bearta coisctheacha: Le brath réamhphostála, beidh úsáideoirí in ann ábhar a d'fhéadfadh a bheith díobhálach a athbhreithniú sula dté sé beo. Cuideoidh an cur chuige réamhghníomhach sin le scaipeadh na fuathchainte a chosc, rud a laghdóidh an gá atá le gníomhaíochtaí pionósacha agus a chothóidh cultúr measa.

Comhlíontacht dhlíthiúil: Trína chinntiú go gcloíonn ardáin meán sóisialta le dlíthe fuathchainte an Aontais, cruthófar caighdeán aonfhoirmeach ar fud an spáis dhigitigh. Leis an gcomhchuibhiú sin, simpleofar forfheidhmiú agus neartófar an creat dlíthiúil in aghaidh na fuathchainte ar líne.

Athrú sóisialta dearfach: Tríd an uirlis sin a chur i bhfeidhm, cuirfear sochaí níos ionchuimsithí agus níos measúla chun cinn. Trí leitheadúlacht na fuathchainte a laghdú, spreagfaimid guthanna agus dearcthaí éagsúla, rud a fheabhsóidh an comhtháthú sóisialta agus comhthuisct.

Ar an iomlán, is céim mhór í an uirlis IS sin i dtreo timpeallacht ar líne níos sábháilte agus níos measúla, lena ndéanfar idirghníomhaíochtaí digiteacha a ailíniú le luachanna na cuimsitheachta agus na dínite.

An moladh i mbeagán focal:

- Uirlis a fhorbairt lena ndéanfar fuathchaint neamhdhleathach ar ardán meán sóisialta a bhrath, agus an fheidhmiúlacht seo a leanas san áireamh.
- Fuathchaint a d'fhéadfadh a bheith ann a bhrath agus a mharcáil de réir chaighdeán an Aontais, cruthaitheoirí a chur ar an eolas, agus an t-ábhar a chur isteach le haghaidh athbhreithniú daonna. Tuairisceofar agus scríosfar ábhar neamhdhleathach; scaoilfear saor an tsaoirse cainte.
- Ábhar a scanadh sula ndéanfar é a phostáil, fógra a thabhairt do chruthaitheoirí maidir leis an bhfuathchaint neamhdhleathach a d'fhéadfadh a bheith ann, agus athbhreithnithe a cheadú. Athbhreithniú a dhéanamh ar ábhar marcáilte agus rabhadh dlíthiúil a thabhairt.

Oideachas

Moladh 15: Cultúr díospóireachta a spreagadh i scoileanna bunaithe ar Phainéil Saoránach

Molaimid miondíospóireachtaí a eagrú ar scoil, ar nós ‘mionphainéal saoránach’, le linn am scoile. Is é an bealach is éifeachtaí chun leanaí a mhealladh chuig an díospóireacht (gan ‘rang saoránachta’ a chruthú) an tionscnamh a shocrú i dtimpeallacht shábháilte, agus tacaíocht ón bpobal oideachais ann: ar nós maoirseoirí, cúntóirí agus múinteoirí. Mar shampla, díospóireacht a eagrú ar bhéilí sa cheaintín, agus aird á tabhairt ar nósanna reiligiúin éagsúla, sin bealach amháin chun plé a chruthú bunaithe ar ábhair praiticiúla a dhéanann difear do leanaí gach lá agus chun tairbhiú de shaineolas daoine sa scoil, ar nós foireann ceaintín agus cócairí. D’fhéadfadh daoine ó chúlraí éagsúla nach bhfuil nasctha go docht leis an earnáil oideachais (póilíní, mar shampla) a bheith páirteach sa phróiseas freisin chun a gcuid oibre a mhíniú do na leanaí. Maidir leis na hábhair a chumhdaítear leis na díospóireachtaí sin, ba cheart dúinn dul i gcomhairle go díreach le leanaí faoi na hábhair ar mian leo a dtuiscintí a dhoimhniú ina leith. Is féidir le leanaí ábhar ar bith a phlé fad a bheidh sé oiriúnaithe dá leibhéal agus iomchuí. Chun an taithí sin agus cultúr na díospóireachta a chomhroinnt ar fud an Aontais Eorpaigh, d’fhéadfadh nascadh idir scoileanna a bheith éifeachtach. Mar shampla, le linn malartuithe, d’fhéadfadh toscairí scoile a ghlac páirt i ndíospóireacht taisteal agus a dtaithí agus a dtuairimí a chomhroinnt le toscairí scoile eile ó thíortha Eorpacha. D’fhéadfadh ‘torthaí’ na ndíospóireachtaí sin cur le hardán na saoránach do leanaí.

Údar:

Bíonn dearcadh níos oscailte ag daoine óga agus bíonn siad in ann glacadh le dearchtaí éagsúla, rud atá ina ghné ríthábhachtach den chomhrac in aghaidh an fhuatha. Dá bhrí sin, ní mór leanaí a chur ar an eolas faoin gcultúr saoránaigh agus faoi rannpháirtíocht saoránach ar scoil (ó 6 go 16 bliana d’aois). Ba cheart na ‘painéil’ sin a eagraítear ar scoil a bheith ina n-uirlis oiliúna do leanaí. D’fhéadfadh cultúr na rannpháirtíochta agus na scileanna a fhorbraítear le linn na ndíospóireachtaí sin a bheith úsáideach ar feadh a saoil. D’fhéadfadh na cláir nasctha i measc scoileanna a bheith éifeachtach toisc nach n-athraíonn sé go hiomlán cláir oideachais na mBallstát, ach cuireann sé tionscnamh coiteann chun feidhme arb é is aidhm dó smaointeoireacht chriticiúil agus tuiscint a mhéadú i measc leanaí na hEorpa.

An moladh i mbeagán focal:

- Tá dearcadh níos oscailte ag daoine óga agus tá siad in ann glacadh le tuairimí éagsúla.
- Ba cheart do leanaí triail a bhaint as cultúr rannpháirtíochta saoránach agus díospóireacht ar scoil (ó 6 go 16 bliana d’aois).

D’fhéadfadh nascadh i measc scoileanna a bheith ábhartha chun eispéiris a roinnt ar an leibhéal Eorpach agus chun cultúir agus meonta eile a mhalartú/a thuiscint.

Moladh 16: Scileanna sóisialta agus mothúchána leanaí a threisiú chun fuath a chosc

Iarraimid bearta gearrthéarmacha agus meántéarmacha a úsáid chun scileanna mothúchána agus sóisialta leanaí a threisiú. Chun é sin a dhéanamh, molaimid feabhas a chur ar an timpeallacht foghlama i scoileanna agus gníomhaíochtaí ar nós amharclannaíochta, na n-ealaíon, cumarsáid neamhfhoréigineach, agus oideachas saoránach a thairiscint i scoileanna agus timpeall orthu chun smaointeoireacht chriticiúil, comhbhá agus scileanna mothúchána a mhúineadh. Sa ghearrthearma, éilimid go mbeadh níos mó staidéir taighde

níos fearr ann maidir le tionchar na gníomhaíochtaí atá beartaithe againn chun fuath a chosc. Sa ghearrthéarma agus sa mheántéarma, iarraimid go ndéanfaí tosaíocht na gclár amhail ERASMUS+, an Clár um Shaoránaigh, Comhionannas, Cearta agus Luachanna, nó cláir a mhaoineítear le cistí struchtúracha an Aontais a athdhíriú chun tacú leis na gníomhaíochtaí sin chun fuath a chosc i scoileanna agus timpeall orthu. Ba cheart don Choimisiún Eorpach a bheith réamhghníomhach chun aird a tharraingt ar na tosaíochtaí sin agus iad a chur in iúl go forleathan (mar shampla, trí mholtaí a dhéanamh do na Ballstáit agus trí ghlaonna ar thionscadail) agus comhoibriú le UNESCO agus le Comhairle na hEorpa chun sioncrónú lena gcláir chomhfhreagracha. D'fhéadfadh scoileanna, múinteoirí agus páirtithe áitiúla na cistí sin a úsáid ansin chun feidhm a bhaint as na gníomhaíochtaí. Chun cuimsiú sóisialta a mhéadú, ba cheart gníomhaíochtaí a bheith saor in aisce do chách. Tar éis tréimhse thart ar 5 bliana, éilimid go ndéanfaí meastóireacht cheart air sin, chun athdhíriú agus cinneadh a dhéanamh an raibh tionchar ag na bearta. D'fhéadfadh sé sin cur le cumas an Aontais maidir le cosc fuatha i scoileanna.

Údar:

Ní thugann an córas oideachais atá ann faoi láthair aird chuí ar shaincheist na scileanna mothúchánacha agus sóisialta Táthar ag fulaingt an fhuatha sna scoileanna chomh maith. Níl na leanaí ullmhaithe go maith le bheith ina ndaoine fásta a bhfuil tuiscint mhaith acu ar a gcuid mothúchán. Is iad na scoileanna an áit a dtéann na leanaí uile agus ar féidir leo foghlaim conas maireachtáil le chéile. Is é an bealach is fearr chun an fuath a chosc ná atmaisféar maith foghlama a chruthú. Nuair a chuireann duine aithne air féin agus ar dhaoine eile is féidir smaointeoireacht chriticiúil agus fhéinchriticiúil níos fearr a dhéanamh agus a bheith níos caoinfhulangaí dá bharr. Is bealaí maithe iad gníomhaíochtaí ar nós amharclannaíochta, damhsa agus cumarsáid neamhfhoréigineach chun na scileanna sin a shealbhú.

An moladh i mbeagán focal:

Réiteach amháin chun fuath sa tsochaí a chosc is ea feabhas a chur ar an timpeallacht foghlama i scoileanna agus chun gníomhaíochtaí ar nós amharclannaíochta, na n-ealaíon, cumarsáid neamhfhoréigineach, oideachas saoránachta a thairiscint i scoileanna agus timpeall orthu. Cuirfidh sé sin ar chumas leanaí a gcuid scileanna mothúchánacha agus sóisialta a fhoghlaim agus a fhorbairt agus beidh comhthuiscint níos fearr ann idir leanaí, agus beidh níos lú fuatha sa tsochaí amach anseo mar thoradh air.

Moladh 17: Oideachas do gach glúin i ngach náisiún maidir le cumarsáid neamhfhoréigineach

Molaimid an méid seo a leanas: Sa ghearrthéarma, treoirlínte maidir le cumarsáid neamhfhoréigineach a chruthú (arna spreagadh ag doiciméid ar nós an lámhleabhar, 'From Hate Speech to Non-Violent Communication') curtha in oiriúint d'ábhair oideachais don óige agus do dhaoine fásta;

- Sa lár téarma, go n-ullmhóidh na Ballstáit cúrsaí maidir le cumarsáid neamhfhoréigineach atá comhlántach le sochair dhífhostaíochta do dhaoine fásta;
- Sa lár téarma, go n-ullmhóidh na Ballstáit ábhair oideachais d'fhostaithe;
- Sa ghearrthéarma, go gcruthóidh an tAontas físeáin faoi na 3 choincheap (CAOINFHULAINGT – CINEÁLTAS – MAITHIÚNAS) in ábhar na meán;
- Sa lár téarma, go gcuirfidh scoileanna deiseanna oideachais maidir le cumarsáid neamhfhoréigineach ar fáil do thuismitheoirí (i scoileanna mar shampla);

- Sa lár téarma agus san fhadtéarma, go nglacfaidh an tAontas oiriúnú téacsanna intuigthe (mar shampla, oiliúint agus scrúduithe): ba cheart cumarsáid neamhfhoréigneach a leabú mar réamhshocrú laistigh dár dteanga;
- San fhadtéarma, go mbeidh na Ballstáit in ann modheolaíocht na cumarsáide neamhfhoréigní a dhéanamh mar chuid de phróisis ath-lánpháirtithe na bpríosúnach.

Údar:

Tá cumarsáid ar cheann de na bealaí is tábhachtaí chun tuiscint a fháil ar an saol, ach ní mhúintear í do dhaoine. Má mhúinimid an scil seo, beidh i bhfad níos lú coinbhleachta agus díospóidí i measc daoine. Feasacht ar mhothúcháin, ar thuiscint agus ar chomhbhá an duine féin i leith daoine eile. Bheadh i bhfad ní ba lú fuatha san Eoraip dá gcuirfí an méid sin i bhfeidhm. Táimid ag buaicphointe an fhuatha anois; ba cheart dúinn laghdú a fheiceáil ina dhiaidh sin. Is é an toradh a bhíonn ar chumarsáid níos fearr ná comhar níos fearr, rud a d'fhágfadh go mbeadh Eoraip níos aontaithe ann.

An moladh i mbeagán focal:

- Na príomhchoincheapa seo a leanas a chur in iúl: CAOINFHULAINGT – CINEÁLTAS – MAITHIÚNAS do bhaill na sochaí trí ghníomhaíochtaí oideachais díreacha agus indíreacha.
- An t-eolas ar chumarsáid neamhfhoréigneach agus úsáid na cumarsáide sin a scaipeadh do gach aois den tsochaí ón óige go daoine fásta, agus tuismitheoirí san áireamh freisin.
- Treoirínte reatha na Náisiún Aontaithe a úsáid agus iad a chur in oiriúint d'ábhair oideachais.
- An tAontas chun ábhair oideachais saor in aisce a chruthú do dhaoine fásta (i dtimpeallachtaí oibre agus oideachais araon);
- Feasacht a mhúscailt trí ábhar meán a ardú chun an scéal faoin modh seo a scaipeadh;
- Cumarsáid de stíl an Lárionaid um Chumarsáid Neamhfhoréigneach (NVC) a dhéanamh d'aon chumarsáid oifigiúil mar bhealach leabaithe chun cumarsáid a dhéanamh le saoránaigh.

Rannpháirtíocht na saoránach agus cuimsiú sóisialta

Moladh 18: Painéil Saoránach Eorpach a chruthú do dhaoine óga (16-25 bliana d'aois) chun fuath a chomhrac

Ba cheart do na Painéil Saoránach Eorpach do dhaoine óga próiseas roghnúcháin randamach a chur i bhfeidhm, ar nós na bpainéal saoránach Eorpach atá ann faoi láthair, toisc go mbíonn ionadaíocht ar ghrúpaí éagsúla mar thoradh air. Ba cheart go gcumhdódh na painéil ábhair a bhaineann leis na dúshláin agus na deiseanna a bhíonn roimh dhaoine óga (mar shampla, bulaíocht, caoinfhulaingt, urraim, steiréitíopaí, agus cuimsiú sóisialta). Ba cheart do na painéil sin daoine óga a úsáid mar shaineolaithe chun tuiscint a neartú ar shaincheisteanna rithábhachtacha agus chun a dtuairimí a ardú ar leibhéal an Aontais. Mar shampla, d'fhéadfadh daoine óga a bhfuil baint acu le comhlachais frith-idirdhealaithe nó lánpháirtithe imirceach gníomhú mar 'shaineolaithe' agus mar 'acmhainní' don Phainéal Óige. Ba cheart na Painéil sin a chur chun cinn ar an ardán rannpháirtíochta saoránach (ar gá athmhachnamh a dhéanamh air, é a dhéanamh níos idirghníomhaí, níos 'faiseanta' agus é a chur chun cinn ar bhealach níos fearr).

Údar:

Is minic nach mbíonn suim ag daoine óga sa pholaitíocht agus tá a ráta vótála ag dul i laghad. Is iad daoine scothaosta a thoghann a n-ionadaithe polaitiúla (cibé acu ar an leibhéal náisiúnta nó ar an leibhéal Eorpach). Chun iad féin a chur ar an eolas faoin díospóireacht pholaitiúil, chun a bheith ar an eolas faoina ndéanann an tAontas Eorpach, agus chun spéis a ghlacadh ann, d'fhéadfadh sé a bheith ina uirlis shuimiúil chun rannpháirtíocht níos buaine a chothú páirt a ghlacadh i bpainéal saoránach Eorpach ar nós an phainéil seo. Tá an leibhéal Eorpach ríthábhachtach toisc, i roinnt mhaith Ballstát, tá fíis 'cinneann an Bhruiséil' ag daoine i leith an Aontais Eorpaigh. Meastar gurb í an Bhruiséil 'an ceannaire mór a chuireann go leor rialacha i bhfeidhm'. D'fhéadfadh sé, trí thriail a dhéanamh le painéal saoránach, go mbeadh daoine óga in ann mothú níos gaire don Eoraip agus d'Eorpaigh óga eile. Ós rud é go bhfuil daoine óga i measc phríomhíospartaigh an fhuatha, tá sé ríthábhachtach, dá bhrí sin, díriú orthu.

An moladh i mbeagán focal:

Molaimid painéil uile-Eorpacha a chruthú go sonrach do dhaoine óga maidir le saincheisteanna frithfhuatha.

Tá dhá aidhm ann: mímhúinín daoine óga sna polaiteoirí a chomhrac agus daoine óga a fheiceáil mar chuid den réiteach ar na fadhbanna éagsúla.

Moladh 19: Seirbhísí saoránachta deonacha a fhorbairt i bpobail áitiúla do dhaoine fásta

Ní mór an t-am chun páirt a ghlacadh sna gníomhaíochtaí deonacha sin a sholáthar, mar shampla trí shaoire a íoc ón obair atá curtha in áirithe go sonrach don rannpháirtíocht saoránach. An tráth céanna, ní mór dúinn oibrithe féinfhostaithe a chur san áireamh. D'fhéadfadh tairbhí eacnamaíocha a bheith ina spreagadh mór chun rannpháirtíocht saoránach a mhéadú i measc catagóirí éagsúla (mar shampla, laghdú cánach). Ar deireadh, ba cheart an tábhacht a bhaineann le tionscnaimh áitiúla a chur chun cinn ar leibhéal an Aontais: d'fhéadfadh an tAontas na tionscnaimh áitiúla sin ar fud na hEorpa a dhreasú agus tacú leo, trí thaithí agus tacaíocht airgeadais a sholáthar. Bheadh fad na seirbhíse deonaí sin níos giorra ná Erasmus i gcás fostaithe nó daoine féinfhostaithe (seachtain amháin, mar shampla).

Údar:

Chun an fuath a chomhrac, tá an leibhéal áitiúil an-tábhachtach, agus is tacaíocht luachmhar don chomhtháthú sóisialta iad na pobail áitiúla. Ba cheart go mbeadh rochtain ag gach aois ar obair dheonach i gcomhlachais a chuireann lánpháirtiú chun cinn, mar shampla. D'fhéadfadh an tAontas Eorpach tacú leis na tionscnaimh sin chun an fuath a chomhrac ar an leibhéal áitiúil agus deis a thabhairt d'eagraíochtaí áitiúla éagsúla taithí a mhalartú.

An moladh i mbeagán focal:

- Ba cheart rochtain a bheith ag cách ar sheirbhísí saoránachta deonacha, gan beann ar imthosca eacnamaíocha nó gairmiúla.
- Ní mór do ghnólaigh ligean dá bhfostaithe triail a bhaint as na scéimeanna Eorpacha sin um obair dheonach (le tacaíocht ón Eoraip).
- Ba cheart luach a chur ar an obair dheonach agus ar na scileanna a fhaightear.

Moladh 20: Cuidiú le filleadh ar bhrí na beatha

Molaimid go spreagfaidh an tAontas spásanna pobail a chruthú chun tacú le daoine imeallaithe. Féadfar an cúnamh sin a threorú i dtreonna éagsúla de réir riachtanais an duine. Molaimid go dtabharfaí an deis do dhaoine obair a fháil, mar chineál neamhspleáchais phearsanta agus cobhsaíochta agus, an tráth céanna, tacaíocht shonrach a sholáthar do na grúpaí sin a bhfuil níos mó deacrachta acu rochtain a fháil ar an margadh saothair, mar shampla, daoine faoi mhíchumas, dídeanaithe, daoine gan dídean, daoine ar baineadh mí-úsáid astu, etc. D'fhéadfadh sé gurb é a bheadh i gceist le cuidiú sonrach sna cásanna sin ullmhú le haghaidh iarratais ar phoist, agallaimh, an cumas aire a thabhairt do shláinteachas an duine agus éadaí iomchuí a fháil don obair.

D'fhéadfadh maoiniú poiblí a bheith ann don chineál seo tionscnamh faoi stiúir an phobail agus, an tráth céanna, líonraí dlúthpháirtíochta agus tionscnaimh oibre deonaí atá ann cheana sa phobal a ghíaráil, ionas gur féidir leis an infheistíocht airgeadais a bheith inbhuanaithe do bhuiséid phoiblí. Ba cheart go mbeadh gealltanais ann go gcoinneofaí coinníollacha maoinithe fadtéarmacha na lárionad ar bun.

Ba cheart dhá riachtanas a chuimsiú leis na tionscnaimh dlúthpháirtíochta agus tacaíochta sin: ar thaobh amháin, cúnamh speisialaithe a chur ar fáil do ghrúpaí sonracha a bhféadfadh riachtanais speisialta a bheith acu agus, ar an taobh eile, cúnamh speisialaithe a sholáthar do ghrúpaí imeallaithe éagsúla gan scálaí tosaíochta ná céadroghanna a chruthú a d'fhéadfadh cur leis an bhfuath agus leis an idirdhealú.

Is féidir cúnamh sonrach láithreach a fháil sna lárionaid sin de réir cásanna pearsanta, le tacaíocht ó oibrithe deonacha agus/nó gairmithe atá oile go cuí agus ar féidir leo daoine a threorú chuig áiteanna inar féidir leo cúnamh sonrach a fháil. Féadfar cúnamh a sholáthar ní hamháin do dhaoine ó ghrúpaí imeallaithe ach d'aon duine atá i gcúinsí pearsanta nó i gcásanna saoil a bhféadfadh tacaíocht a bheith ag teastáil ina leith.

D'fhéadfadh ceardlanna, gníomhaíochtaí, malartuithe traschultúrtha, imeachtaí agus ceiliúradh a bheith ann sna lárionaid phobail sin freisin a chuideodh le muintearas pobail a chruthú agus le bacainní idirdhealaithe a sháru. Ba cheart na spásanna sin a dhaonnú, is é sin, fáilte a chur roimh dhaoine agus iad a chur ar a suaimhneas.

Ba cheart gealltanais frithpháirteach a bheith ann idir an lárionad, a sholáthróidh cuidiú, agus an faighteoir, a chaithfidh torthaí comhaontaithe a bhaint amach laistigh de thréimhse ama áirithe. D'fhéadfadh sé go mbeadh tréimhse ama níos faide ag teastáil chun cásanna speisialta a réiteach, arna mheas ar bhonn cás ar chás saineolaithe.

Údar:

Tá sé tábhachtach toisc go bhfaigheadh daoine a lán faoisimh trí dhul go dtí na lárionaid phobail sin. Bheidís nua, chuirfidís dóchas ar fáil agus spreagfaidís daoine. Chuirfeadh sé feabhas ar mheabhairshláinte, chuideodh sé le daoine a bhfuil fadhbanna acu sa bhaile, d'fhéadfadh sé dídean a sholáthar do na daoine uile atá i riocht lag ar féidir leis an réiteach seo cuidiú leo, ligean do dhaoine a gceart bunúsach chun saol díniteach a bheith acu agus cuidiú le daoine brí a fháil sa saol. Tá sé tábhachtach toisc gur féidir le daoine tionchar a imirt ar a chéile, caidrimh a thógáil, agus fadhbanna a chéile a thuiscint. Ní bhraithfeadh daoine go bhfuil siad aithisithe ná lipéadaithe. Ní mór dúinn a bheith inár ndaoine arís (ní hamháin dlús a chur leis an teicneolaíocht chun dochair don daonnú). Tá deiseanna ag teastáil ó dhaoine, agus d'fhéadfadh an moladh sin deiseanna fostaíochta a chruthú.

D'fhéadfadh an moladh sochaí níos ionchuimsithí, níos córa, níos cothromaíche, níos fiúntaí agus níos comhbháiche a chothú, ina mbeidh gach duine in ann a bheith páirteach go cothrom

sa tsochaí, agus nach ndéanfaimid normalú ar shaincheistean na n-ós na bochtaineachta agus easpa dídine toisc go gcruthaíonn siad fuath.

D'fhéadfadh an moladh sin cuidiú leis an tsochaí ar leibhéal an phobail. I dtéarmaí tionchair de, ní mór dúinn freagairtí domhanda a sholáthar ar shaincheistean domhanda. Bheadh tionchar le feiceáil ar an mionscála sula ndéanfaí é a fhorbairt.

Tá rioscaí ann mura bhfuil oibrithe sóisialta ullmhaithe chun an obair a dhéanamh agus mura bhfuil an smaoineamh deartha go maith. Rioscaí eile a d'fhéadfadh a bheith ann ná rioscaí airgeadais, rioscaí teanga nó rioscaí a bhaineann le lánpháirtiú.

An moladh i mbeagán focal:

- Ba cheart don Aontas cruthú spásanna pobail a spreagadh chun tacú le grúpaí imeallaithe.
- Ba cheart cúnamh a chur in oiriúint do riachtanais an duine le tacaíocht ó oibrithe deonacha agus/nó gairmithe atá oilte go cuí, le gealltanas frithpháirteach idir an lárionad agus an faighteoir maidir le torthaí agus tréimhsí ama comhaontaithe, agus d'fhéadfaí síneadh ama a chur leis sin i gcásanna speisialta.
- Ba cheart gealltanas a bheith ann do mhaoiniú poiblí fadtéarmach agus, an tráth céanna, líonraí dlúthpháirtíochta agus tionscnaimh dheonacha atá ann cheana a ghíaráil.

Moladh 21: Na daoine a chuardach: Neamh-chomhionannas sóisialta a chomhrac chun fuath a chomhrac san Aontas

Tá an neamh-chomhionannas sóisialta, mar a leagtar amach i sainmhíniú na faidhbe, ar cheann de phríomhchúiseanna an fhuatha inár sochaí. D'ainneoin a thábhachtaí atá sé, níor thug institiúidí an Aontais ná na Ballstáit aghaidh go leordhóthanach ar an bhfadhb sin, rud a leagann béim ar an ngá atá le taighde cuimsitheach atá maoinithe ag an Aontas chun na naisc idir neamh-chomhionannas sóisialta agus an fuath a shainaithint agus chun iad a chomhrac.

Tá sé fíor-riachtanach tuiscint a fháil ar na naisc sin chun beartais agus idirghabhálacha éifeachtacha a fhorbairt. Gan fianaise eimpíreach láidir, bunaithe ar shonraí cáilíochtúla agus cainníochtúla, d'fhéadfadh sé go ndéanfaí iarrachtaí chun aghaidh a thabhairt ar neamh-chomhionannas sóisialta a chur amú nó a bheith neamhéifeachtach. Trí pháirt a thabhairt d'eagraíochtaí sóisialta i mbailiú sonraí, cinntítear go léirítear leis na sonraí an saol mar atá do na daoine sin is mó a ndéanann neamh-chomhionannas difear dóibh, lena soláthraítear bonn níos cruinne agus níos ábhartha le haghaidh taighde le cur chuige ón mbun aníos. Trí na torthaí sin a fhoilsiú ar bhonn leanúnach, cuirfear bonn eolais faoi na hiarrachtaí leanúnacha atá á ndéanamh agus déanfar iad a bheachtú. Féadfar torthaí na staidéar a chur san áireamh i bhfeachtais ardaithe feasachta.

Údar:

Trí threoirilínte agus feachtais a fhorbairt bunaithe ar thaighde críochnúil, is féidir gníomhaíochtaí spriocdhírithe a dhéanamh lena dtugtar aghaidh ar na bealaí sonracha ina gcothaítear fuath leis an neamh-chomhionannas sóisialta. Leis an gcur chuige straitéiseach sin, is féidir an teannas sóisialta a laghdú go mór agus an comhtháthú sóisialta a chur chun cinn, mar aon le hathrú córasach a chumasú.

Trí shonraí a bhailiú maidir le tionchar na mbeart dearfach agus trí thorthaí a fhoilsiú go leanúnach, cothaítear trédhearcacht agus cuntasacht. Ní hamháin go gcuirtear eolas ar fáil do lucht ceaptha beartas agus do pháirtithe leasmhara leis an bpróiseas sin, ach cothaítear muinín

an phobail freisin agus spreagtar iarrachtaí comhoibríocha chun aghaidh a thabhairt ar an neamh-chomhionannas sóisialta.

Trí chaighdeáin a bhunú le haghaidh sonraí fíoraithe iontaofa agus modheolaíocht chomhchuibhithe, agus guthanna pearsanta mar aon le sonraí cainníochtúla agus cáilíochtúla araon san áireamh, cinntítear iontaofacht agus cuimsitheacht an taighde.

Tá sé ríthábhachtach aghaidh a thabhairt ar an neamh-chomhionannas sóisialta trí thaighde cuimsitheach agus trí bhailiú sonraí chun an fuath a mhaolú agus chun sochaí níos comhtháite a chothú laistigh den Aontas. Leis an gcur chuige sin, soláthraítear na léargais agus na huirlisí is gá chun beartais agus idirghabhálacha éifeachtacha a fhorbairt, rud a chuirfidh, ar deireadh, le tírdhreach sóisialta níos cothroime agus níos síochánta.

An moladh i mbeagán focal:

- Níl institiúidí an Aontais ná na Ballstáit tar éis dul i ngleic go leordhóthanach leis an neamh-chomhionannas sóisialta (mar chúis an fhuatha) agus, mar sin, ní mór tuilleadh taighde a dhéanamh chun a chinntiú go ndéanfar naisc idir neamh-chomhionannas sóisialta agus an fuath a shainaithint agus a chomhrac.
- Taighde cuimsitheach arna mhaoiniú ag an Aontas a dhéanamh ar an nasc idir neamh-chomhionannas sóisialta agus an fuath, ina mbeidh páirtithe leasmhara éagsúla páirteach i mbailiú sonraí. Úsáid a bhaint as na torthaí chun beartais spriocdhírithe agus feachtais feasachta a fhorbairt chun comhtháthú sóisialta a chur chun cinn.
- Eagraíochtaí neamhrialtasacha, na Ballstáit agus institiúidí taighde a spreagadh chun sonraí a bhailiú go forleathan agus úsáid á baint as modhanna cáilíochtúla agus cainníochtúla araon.
- Foilsiú leanúnach na dtorthaí a chinntiú.